

Ta'ita'i-Fono: Fa'aeteete Saifoloi, FT
Sui Ta'itai-Fono: Dr. Leatulagi Fa'alevao, FT
Failautusi Aoa: Nafatali Falealii, FS
Teutupe: Fiasili Puni E. Haleck, TK



Ekalesia Fa'apotopotoga Kerisiano Amerika Samoa
Pusa Meli 1537 – 1 Kanana Fou Street
Pago Pago, Amerika Samoa 96799
Tel. (684) 699-9810 Fax: (684) 699-1898
imeli: nfalealii@efkasonline.org
upega-tafailagi: <https://efkasonline.org>

Ofisa a le Failautusi Aoa, EFKAS

Aperila 2, 2020

Susuga i Toeaiina ma Faafeagaiga,
Susuga i Faifeau ma A'oa'o,
Afioga i Tiakono,
Le nofo i Matagaluega ma Pulega,
Mamalu o le Ekalesia Aoa EFKAS

FA'AALIGA FA'ALAU'ITELE #2 MO LE EFKAS ONA O LE CORONAVIRUS (COVID-19)

Susuga e,

E toe fa'atalofa ma ofo alofa atu i le mamalu o le Ekalesia Aoa; susuga i Toeaiina ma Fa'afeagaiga, mamalu o le 'aufaigaluega i Faifeau ma A'oa'o, afioga i Tiakono, Tamā ma Tinā matutua, tainane le loaloa o le Ekalesia i ona falesā e fia. E maualuga pea le viiga ma le fa'afetai i le Atua, auā e talitonu le manatu, o Lona alofa ma Lona agalelei o loo malu puipua ai pea lo outou soifua ma si o matou ola, mai i lenei fa'ama'i faigata e pei ona pesia ai le lalolagi. Malo le fa'atuatua. Fa'afetai le lototele i le Atua ma lana galuega.

I le ava tele ma le fa'aaloalo e tatau ai, e fia tu'uina atu le lona lua lenei o fa'aaliga fa'alau'itele mo le mamalu o le EFKAS, auā le aga'i i luma o le Ekalesia ma lana galuega a o fa'amalumu mai pea le fa'ama'i faigata o le COVID-19. E fautuaina le fa'aauu pea o lapataiga sa tu'uina atu i le fa'aaliga muamua. Peita'i, ua i ai nai suiga ma fa'aopoopoga fou ua manatu ai le Laulauafono, ma ua finagalo 'autasi ai le Komiti a Tamā o le Ekalesia i Samoa nei, ona o nisi o tulaga fou ua tula'i mai e ono aafia ai le Ekalesia ma le fa'atinoga o lana galuega.

I le ava tele ma le fa'aaloalo, e tu'uina atu ai le fa'aaliga lona lua lea mo 'aulotu uma o le EFKAS:

#1. Lapataiga mo 'aulotu i Amerika Samoa:

- E tusa ai ma le talosaga a le Kovana o Amerika Samoa sa fa'aoo mai i le Laulauafono i le aso 1 o Aperila, ua finagalo ai Tamā o le Ekalesia i Samoa nei, ***ia taofia loa sauniga lotu i le Aso Sa*** seia o'o i se taimi tala feagai. E moni tatou te lei o'o i le *code yellow* e pei ona ta'ua i le fa'aaliga muamua. E lei fa'amaonia foi se tasi ua aafia i le fa'ama'i i Amerika Samoa nei. Peita'i, o le 'aioi mai o le Kovana, ma ua talia foi e Tamā o le Ekalesia i Samoa nei, e lelei lava le saogalemu ma le nofo puipua, ne'i po'ia fa'amanu i ofaga le atunuu e lenei fa'ama'i mata'utia.
- E fautuaina le faia o lotu a le 'aiga lava ia i le Aso Sa. E pei ona faia e 'aulotu i fafo, e mafai ona fa'aaoga fesootaiga fa'anei ona po, e pu'e ai faigalotu a le faifeau ma fa'asalalau atu i tagata lotu i luga o le upega tafailagi (*facebook, zoom, etc*).
- E fautuaina le faia pea o lafoga e pei ona masani ai, aemaise o faiga Taulaga ma le Alofa o le faifeau. E tofua lava le falesā ma Komiti fa'apitoa e feagai ma ia tulaga – le matāfaioi tasi lea o afioga i Tiakono. E fautuaina le sailia o 'auala saogalemu e tala feagai ma tulafono mo le nofo puipua, e fa'atino ma fa'amaopoopo ai ia fuafuaga mo le aga'i pea i luma o le Ekalesia ma lana galuega. E pei ona masani ai, o le Taulaga Tele, Taulaga 'Au Taumafai, ma le Taulaga 'Au Leoleo, e tatau ona fa'aoo mai i le Ofisa Tutotonu i le masina o Me.
- O sauniga fa'apitoa e pei o maliu, fa'aipoipoga, ma isi sauniga e pei ona masani ai, e fautuaina le fa'amalosia pea o lapataiga sa tu'uina atu i le fa'aaliga muamua.

Ta'ita'i-Fono: Fa'aeteete Saifoloi, FT
Sui Ta'itai-Fono: Dr. Leatulagi Fa'alevao, FT
Failautusi Aoa: Nafatali Falealii, FS
Teutupe: Fiasili Puni E. Haleck, TK



Ekalesia Fa'apopotoga Kerisiano Amerika Samoa
Pusa Meli 1537 – 1 Kanana Fou Street
Pago Pago, Amerika Samoa 96799
Tel. (684) 699-9810 Fax: (684) 699-1898
imeli: nfalealii@efkasonline.org
upega-tafailagi: <https://efkasonline.org>

#2. Lapataiga mo 'aulotu i Amerika, Niu Sila, ma Ausetalia:

- E fautuaina le fa'amalosia pea o lapataiga sa tu'uina atu i le fa'aaliga muamua.
- E fautuaina le faia pea o lafoga e pei ona masani ai, aemaise o faiga Taulaga ma le Alofa o le Faifeau. E tofu lava le falesā ma Komiti fa'apitoa e feagai ma ia tulaga – le matāfaioi tausi lea o afioga i Tiakono. E fautuaina le sailia o 'auala saogalemu e tala feagai ma tulafono mo le nofo puipuia, e fa'atino ma fa'amaopoopo ai ia fuafuaga mo le aga'i pea i luma o le Ekalesia ma lana galuega. E pei ona masani ai, o le Taulaga Tele, Taulaga 'Au Taumafai, ma le Taulaga 'Au Leoleo, e tatau ona fa'aoo mai i le Ofisa Tutotonu i le masina o Me.

#3. Faigalotu o le TV:

- E fautuaina le fa'ataunuaina pea o faigalotu i le TV e pei ona fa'atulaga atu i le Kalena a le Ekalesia 2020. Mo le silafia, o le taimi tonu leni e matuā manaomia ai lava e le atunuu le Upu a le Atua ma le fa'amafanafana o le 'aufaigaluega, a o lu'itauina le ola fa'atuatua o tagata lotu i leni fa'ama'i faigata.
- Ina ia usita'ia tulafono mo le nofo puipuia, e fautuaina le faifeau e pu'e na'o ia lana faigalotu. Afai e fia fa'aaogaina se 'aufaipese, e le tatau ona sili atu le fainumera o le 'aufaipese ma le aofo'i o tagata o loo fa'atagaina i lalo o tulafono mo le nofo puipuia (10).
- Afai e i ai ni 'aulotu EFKAS i fafo e le mafai ona fa'ataunuaina le faigalotu o le TV, ia vave logo mai le Failautusi Aoa e toe fai ai se feutaga'iga.

#4. Aso Lulu Anapogi a le EFKAS

E toe fa'amanatu atu le Aso Anapogi o le EFKAS, o le Aso Lulu lea i vaiaso ta'itasi, mai le 6:00am i le taeao i le 12:00pm i le aoauli. E fa'aaau pea le anapogi lea seia o'o ina fa'aitiitia ma tineia le fa'ama'i. Na'o le Atua tatou te maua ai le fofō o leni fa'ama'i. Tatou tatalo laia ma anapogi fa'atasi i le Atua, e le gata e talosia ai i latou ua aafia i leni fa'ama'i, ae fa'apea le galuega tele o loo feagai ma ta'ita'i o atunuu, aemaise o alii ma tama'itai foma'i, o loo galulue pea mo le puipuia o tagata lautele.

E momoli atu le fa'amalo ma le fa'afetai i le mamalu o le Ekalesia Aoa i lo outou soifua ofoina atu mo le Atua ma lana galuega, i leni vaitau lē faigofie e pei ona feagai ai ma le lalolagi. Ia agalelei pea le Atua ma puipui le soifua o Lana Ekalesia ma tagata lotu uma. E ui o loo tatou nonofo nei i le ataata o le COVID-19, a o se fa'amanatu taūa mo le Ekalesia i leni lava vaitau fa'apitoa, o loo tatou nonofo foi nei i le ataata o le satauro, aemaise le fa'aolataga na saunia e le Atua e ala i le maliu ma le toetu manumalo o Keriso mai le oti ma le tuugamau. Ia avea lena e fai ma fa'amoemoe ola mo le EFKAS, tatou te folau fa'atasi ai i leni vaitau lē faigofie. Ia saogalemu ma malu puipuia i tatou uma i 'aao agalelei o le Atua.

O la outou auauna,


Nafatali Falealii FS
Failautusi Aoa EFKAS